



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

A nr.1007/2013

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët: Muharrem Shala kryesues, Xhevdet Abazi dhe Rafet Haxhaj anëtarë, duke vendosur lidhur me ankesën e Rrjetit Ballkanik për Gazetari Huluntuose (BIRN), paraqitur kundër Erzen Vraniqi nga Lëvizja Vetëvendosja (LVV), për shkak të thyerjes së heshtjes zgjedhore, gjatë ditës së zgjedhjeve, në raundin e dytë të zgjedhjeve lokale, në seancën e panelit të mbajtur me 04.12.2013, mori këtë:

VENDIM

Miratohet si e bazuar ankesa e Rrjetit Ballkanik për Gazetari Huluntuose (BIRN), në Prishtinë, kështu që Lëvizjes Vetëvendosje (LVV) dega në Prishtinë, i shqiptohet dënimi me gjobë në vlerë prej 250 (dyqindpesëdhjetë) euro, të cilën detyrohet ta paguaj në afat prej 15 (pesëmbëdhjetë) ditë nga dita e pranimi të këtij vendimi.

Arsyetim

PZAP-i, më datë 02.12.2013 ka pranuar një ankesë, nga BIRN, në Prishtinë, në të cilën theksohet se me datën 01 dhjetor 2013, në cilësinë e vëzhguesit nga BIRN, të certifikuar nga KQZ-ja, ka monitoruar respektimin e heshtjes zgjedhore nga partitë politike në media të sociale. Vëzhguesi thekson se aty ka vërejtur që Erzen Vraniqi nga Sekretariati për Media dhe Komunikim nga LVV, ka shkelur ligjin duke bërë fushatë në faqen zyrtare të tij në rrjetin social të Facebook-ut dhe Twitter. Aty ai ka bërë një postim ku i fton qytetarët ta votojnë Lëvizjen Vetëvendosje në ditën e zgjedhjeve dhe kjo konsiderohet si ndikim i ushtruar ndaj popullsisë. Për më tepër, në faqen e tij të Twitter-it ka bërë thirrje me fjalët: „Voto tani, na ndihmoni ta mbrojmë votën dhe ta bëjmë ndryshimin”.Parashtresuesi i ankesës thekson se përmes këtij postimi ka bërë fushatë të hapur dhe ky veprim bie ndesh me nenin 36 të Ligjit për Zgjedhjet e Përgjithshme, si dhe ka të bashkangjitur dy faqe të rrjetit Facebook dhe Twitter.

PZAP-i, në kuptim të nenit 4 paragrafi 3 të Rregullave dhe Procedurave të PZAP-it, e informoi LVV më datën 03.12.2013, për ankesën që është bërë ndaj saj dhe ka kërkuar që të përgjigjet ndaj ankesës deri më datë 04.12.2013 deri në ora 10:00. PZAP-i, pranoi përgjigjen e kërkuar nga LVV, në të cilën theksohet se postimi i teksteve që i janë bashkëlidhur ankesës nuk mund të provojnë autorësinë e postimit të fotografisë, si dhe pronësinë e llogarisë në rrjetin Facebook dhe Twitter të shkelësit të supozuar, si dhe përmbajtja e tekstit të postuar në të dy rrjetet sociale nuk paraqet përmbajtje e cila duhet cilësuar si thirrje për votimin e subjektit të caktuar politik. Në postimin e rrjetit social në Facebook nuk mund të cilësohet si thirrje për votim e subjektit të caktuar pasi që këto janë konstatime subjektive dhe nuk janë fjali të cilat duhet kuptuar si thirrje, kurse në tekstin e

supozuar që është postuar në rrjetin social Twitter, përmbajtja nuk përkon fare me bërjen e fushatës, por bën thirrje për dalje në votim, si dhe duke pasur parasysh natyrën e funksionimit të rrjetit social Facebook dhe Twitter nuk do të duhej të interpretohet si hapësirë publike, e cila duhet të njehsohet me thirrje publike, siç rëndomtë ka për qëllim fushata elektorale, thuhet në përgjigjen në ankesë nga LVV.

PZAP-i, pasi që shqyrtoj ankesën gjeti se:

Ankesa është e bazuar

Nga fotot e ofruara si provë të cilat gjenden në shkresat e lëndës shihen qartë faqja zyrtare e Sekretariatit për Media dhe Komunikim i LVV-së, në rrjetin social Twitter si dhe përmbajtja tekstuale e postimit të bërë në rrjetin social Facebook dhe Twitter nga Erzen Vraniqi nga Sekretariati për Media dhe Komunikim nga LVV, ku shihet se bën thirrje për ndryshim dhe votim të kandidatit për kryetar të Komunës së Prishtinës Shpend Ahmeti, me datë 01.12.2013, për Raundin e dytë në Zgjedhje Lokale, i cili veprim është në kundërshtim me nenin 7.1 pika b), e Rregullës Zgjedhore Nr.11/2013, dhe me nenin 36.1 pika b) të LZP-së, e cila përcakton se : Njëzetekatër (24) orë para hapjes së Qendrave të Votimit për hedhjen e votës, e deri në mbylljen e tyre, subjekteve politike, mbështetësve ose kandidatëve të tyre u ndalohet secili nga veprimet si bërja e fushatës në çfarëdo mënyre.

Për përcaktimin e lartësisë së gjobës të vendosur në dispozitiv të këtij vendimi PZAP-i, ka marrë parasysh faktorët në vijim:

- Natyra e shkeljes dhe ndikimit të mundshëm të saj në procesin zgjedhor;
- Shkallën dhe peshën e shkeljes;
- Nëse subjekti politik ka marrë pjesë në zgjedhjet e mëparshme, konsiderohet se kanë qenë të njoftuar me obligimet dhe përgjegjësit gjatë procesit të fushatës;
- Nëse subjekti politik ka bërë shkelje të ligjeve zgjedhore në fuqi në këto zgjedhje apo në zgjedhjet e mëparshme në Kosovë si dhe
- Shumën e fondeve të marra nga subjekti politik prej Buxhetit të Republikës së Kosovës, për zhvillimin e aktiviteteve të lidhura me fushatën zgjedhore.

Prandaj PZAP, duke marr parasysh të gjitha arsyet e lartcekura se nga ana e Erzen Vraniqi nga Sekretariati për Media dhe Komunikim nga LVV, është shkelur neni 7 paragrafi 1 pika "b" të Rregullës Zgjedhore 11/2013 të KQZ-së dhe nenin 36 paragrafi 1 pika b) të LZP-së, pasi që personi në fjalë ka postuar në rrjetin social Facebook dhe Twitter, përmbajtje tekstuale me të cilën bën thirrje për ndryshim dhe votim të kandidatit Shpend Ahmeti për kryetar të Komunës së Prishtinës, në ditën e zgjedhjes me datë 01.12.2013, për Raundin e dytë në Zgjedhjet Lokale, PZAP, në kuptim të nenit 120 paragrafi 1 pika c), si dhe nenit 118.1 të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa në Prishtinë

Anr. 1007/2013 më datën 04.12.2013.

**Kryesuesi i Panelit
Muharrem Shala**



Këshillë Juridike: PZAP nuk do t'i pranojë kërkesat për ri-apelim, sepse vendimet e tij do të konsiderohen si përfundimtare. Prandaj, siç parashihet në Nenin 118.4 të LZP-së, *ankesa në Gjykatën Supreme të Kosovës mund të paraqitet brenda njëzetekatër (24) orëve nga momenti i marrjes së vendimit nga PZAP-i, në rast se gjoba e përfshirë është më e lartë sesa pesëmijë (5, 000) Euro ose në rast se çështja prek një të drejtë themelore.*